

*Edificio y terreno
ta di gobierno:*

VERPLEEGTHUIS SAN NICOLAS MESTER DI RENOVACION



ORANJESTAD (AAN) -- Dia 1 di September ultimo Verpleegthuis San Nicolas a cumpli 9 año di existencia. Nan ta conta cu 34 enfermera y 11 trahador pa cushina y lavanderia, etc., pa aun total di 48 grandi.

E cabezante ta Clarice Jacobino, cabesante interino ta Carol Shoop, y miembro di staf Naomi Ladeutt.

Mayoria di grandi hospeda na Cas di Anciano di San Nicolas mester di yudanza total, es decir, no por percura pa nan mes den ningun sentido.

E edificio, mes mester di un bon renovacion, ya cu e mantencion di e edificio a bay hopi atras. E propiedad completo ta di gobierno y no di SABA, y ta pesey ta gobierno mester zorg pa mantenimiento.

E edificio aki manera ta conoci, den pasado tabata un school publico, y awor el a deteriora hopi. E plafond ta dañá y e dak ta liek un poco. Den tempo di yobida esaki ta trece su efectonan fastioso cune.

E situacion a worde treci caba dilanti gobierno pa bin cu un proyecto di renovacion, y ta di spera cu pronto esaki lo por bay door, alomenos esey ta e speranza cu tin.

Actualmente tin un bon


terapeuta den dienst pero lamentablemente e no ta dispone di e equipo necesario pa traha cune.

BOLUNTARIO

Tin varios voluntario cu ta duna un man na cas di anciano di San Nicolas, den e sentido di recreacion y pa reza.

Pero e trabao tin biaha ta resulta asina pisa y duro, pa motivo cu mayoria di anciano mester di ayudo total cu lo tabata bon si na Aruba lo por lanta un grupo di voluntario cu tin capacidad pa cuida anciano, pa duna e personal un man den e atencion personal di e cliente.

Tin paisnan unda miembronan di famia di anciano mes, cu tin un poco tempo liber ta haci e sorto di trabao voluntario aki, of tambe amanan di cas cu ta duna un man, e.o., e asina yama "Dama Gris". Na Aruba lo tabata bon si den futuro lo por haya un alternativa den e sentido aki, pa siquiera algun par di ora den siman, por yuda den aspectonan di cuida fisico mes, por ehemplo pa duna cuminda, yuda den e parti higienico y bistimento di cliente, etc., specialmente pa e categoria di anciano cu ta full dependiente.



Telefon di **DIARIO**
26747